

四庫全書

史部

欽定四庫全書

欽定續通志卷一百八十二

宗室傳

唐二

高祖諸子

隱太子建成

衛王玄霸

巢王元吉

楚王智雲

荆王元景

漢王元昌

鄴王元亨

周王元方

徐王元禮

韓王元嘉

彭王元則

鄭王元懿

霍王元軌

虢王鳳

道王元慶

鄧王元裕

舒王元名

魯王靈夔

江王元祥

密王元曉

滕王元嬰

高祖二十二子竇皇后生建成太宗皇帝玄霸元吉萬

貴妃生智雲莫嬪生元景孫嬪生元昌尹德妃生元亨

張氏生元方郭嬪好生元禮宇文昭儀生元嘉及第十

九子靈夔王才人生元則張寶林生元懿張美人生元

軌楊美人生鳳劉婕妤生元慶崔嬪生元裕小楊嬪生
元名楊嬪生元祥魯才人生元曉柳實林生元嬰

隱太子建成小字毗沙門資簡弛不治常檢荒色嗜酒
畋獵無度所從皆博徒大俠隋末高祖被詔捕賊汾晉
間留建成護家居河東高祖已起兵密召與元吉赴太
原隋人購之急從間道至授左領軍大都督封隴西郡
公引兵略定西河從平京師唐國建為世子開府置官
屬又遷撫軍大將軍為東討元帥將萬人

舊唐書作
將兵十萬
徇

洛陽授尚書令高祖受禪立為皇太子詔率將軍桑顯和擊司竹羣盜平之涼州人安興貴殺李軌以衆降

按吳

續糾謬載李軌傳安修仁興貴執軌送之斬於長安又高祖紀武德二年五月庚辰涼州將安修仁執李軌以降然則非興貴殺軌也今考資治通鑑所載與李軌傳及高祖紀皆同詔趣原州應接建

成素驕不恤士雖甚暑晝夜馳獵衆不堪其勞亡者過半帝欲其習事乃敕非軍國大務聽裁決之又以李綱鄭善果為宮官參謀議舊胡劉公成寇邊詔建成進討破之鄜州斬虜千計引渠長悉官之使還招羣胡公成

與它大帥降建成畏其衆給欲城州縣者使降胡探築
陰勒兵殺六千人公成奔梁師都嘗循行北邊遇賊四
百出降誠其耳縱之中允王珪洗馬魏徵以帝初興建
成不知謀而秦王數平劇寇功冠天下英豪歸之陰許
立為皇太子勢危甚會劉黑闥亂河北珪等進說曰殿
下特以嫡長居東宮非有功德為人所稱道今黑闥
叛殘孽衆不盈萬利兵塵之唾手可決請往討因結山
東英俊心自封殖建成遂請行黑闥賊洺水建成問徵

曰山東其定乎對曰黑闥雖敗殺傷太甚其魁黨皆懸
名處死妻子係虜欲降無繇雖有赦令獲者必戮不大
蕩宥恐殘賊嘯結民未可安既而黑闥復振廬江王瑗
棄涖州山東亂命齊王元吉討之有詔降者赦罪衆不
信建成至獲俘皆撫遣之百姓欣悅賊懼夜奔兵追戰
黑闥衆猶盛乃縱囚使相告曰覩而甲還鄉里若妻子
獲者既已釋矣衆乃散或縛其渠長降遂禽黑闥帝晚
多內寵張嬪好尹德妃最幸親戚分事宮府建成與元

吉通謀內結妃御以自固當是時海內未定秦王數將
兵在外諸妃希所見及洛陽平帝遣諸妃馳閱後宮見
府庫服玩皆私有求索為兄弟請官秦王已封帑簿及
官爵非有功不得妃媛曹怨之會為陝東道行臺有詔
屬內得專處決王以美田給淮安王神通而張嬖好為
父丐之帝手詔賜田詔至神通已前得不肯與嬖好妾
曰詔賜妾父田而王奪與人帝怒召秦王讓曰我詔令
不如爾教邪佗曰謂裴寂曰兒久典兵為儒生所誤非

復我昔日子秦府屬杜如晦騎過尹妃父門恚其傲率
家童捽毆折一指父懼即使妃前訴秦王左右暴其父
帝不察大怒詰王曰兒左右乃凌我妃家况百姓乎王
自辯曉訖不置繇是見疏帝詔諸王燕秦王感母之不
及有天下也偶獨泣帝顧不樂妃媛因得中傷之為建
成游說曰海內無事陛下春秋高當自娛秦王輒悲泣
正為真忌妾屬耳使陛下萬歲後王得志妾屬無遺類
東宮慈愛必能全養乃皆悲不自勝帝惻然遂無易太

子意突殿入冠帝議遷都秦王苦諫止建成見帝曰秦
王欲外禦寇沮遷都議以久其兵而謀篡奪帝寢不悅
初帝令秦王居西宮承乾殿元吉居武德殿與上臺東
宮晝夜往來皆攜弓刀相遇如家人禮由是皇太子令
秦齊二王教與詔敕雜行內外懼莫知所從建成等私
募四方驍勇及長安惡少年二千人為宮甲屯左右長
林門號長林兵又令左虞侯率可達志募幽州突厥兵
三百內宮中將攻西宮或告於帝帝召建成責之乃流

達志爲州華陰楊文幹素凶詖建成昵之使爲慶州總
管遣募兵送京師欲爲變時帝幸仁智宮秦王元吉從
建成謂元吉曰秦王且徧見諸妃彼金寶多有以賂遺
之也吾安得箕踞受禍安危之計決今日元吉曰善乃
命郎將仝朱煥校尉橋公山齋甲遺文幹趣興兵煥等
懼至幽鄉白反狀寧州人杜鳳資治通鑑作杜鳳舉亦上變帝遣
司農卿宇文穎驛召文幹元吉陰結穎使告文幹文幹
遽率兵反帝以建成首謀未忍治即詔捕王珪魏徵及

左衛率韋挺舍人徐師墓左衛車騎馮世立欲殺之以
薄太子罪乃手詔召建成建成懼不敢往師墓勸遂舉
兵詹事主簿趙弘智諫建成損車服速往謝罪乃詣行
在所未至屏官屬徑入謁叩頭請死投身於地不能起
帝怒夜囚幕中使兵衛守會文幹陷寧州帝驚以宮近
賊夜率衛士南趣山行十餘里明乃還宮召秦王問計
對曰文幹豎子耳官司當即禽之就使假刻漏之久正
須遣一將可辦帝曰事連建成恐應者衆爾自行還吾

以爾為太子使建成王蜀蜀地狹不足為變若不能事
汝取之易也秦王率眾趣寧州文幹為其下所殺以其
首降執宇文頴送京師秦王之行元吉及內嬖更為建
成請封德彝亦陰說帝由是意解復詔建成居守但責
兄弟不相容而謫王珪韋挺天策兵曹叅軍杜淹於遠方

謹按通鑑輯覽

御批高祖無卓識泥古而立建成即當有以處世民及至文幹通
謀事發已許廢建成而立世民矣顧乃外
惑佞臣內牽嬖妾濡忍釀禍誰執其咎哉然怨猜日結建成

等召秦王夜宴毒酒而進之王暴疾絕血數升淮安王扶掖

還宮帝問疾敕建成秦王不能酒母夜聚又謂秦王曰
吾起晉陽平天下皆爾力將定東宮爾亟讓故成而美
志又太子立多歷年吾重奪之觀而兄弟終不相下同
在京師忿閔且深爾還洛陽行臺自陝以東悉主之建
天子旌旗如梁孝王故事王泣曰非所願也不可遠勝
下帝曰陸賈漢臣也猶遜過諸子況我天下主東西兩
宮思汝即往何所悲邪王將行建成等謀曰秦王得土地
甲兵必為患留之京師一匹夫耳因密使人說帝言秦

王左右皆山東人聞還洛皆洒然喜觀其意不復來矣
事果寢戢而突厥寇邊太子薦元吉北討欲因其兵作
亂長孫无忌房元齡杜如晦尉遲敬德侯君集等勸秦
王先圖之王乃密奏建成等與後宮亂因曰臣無負兄
弟今乃欲殺臣是為世克建德復仇使臣死雖地下愧
見諸賊帝大驚報曰旦日當窮治而必早參張婕妤耽
語建成乃召元吉謀曰請勒宮中託疾不朝建成曰善
然不共入朝事何緣知遲明乘馬至玄武門秦王先至

以勇士九人自衛時帝已召裴寂蕭瑀陳叔達封德彝
宇文士及竇誕顏師古等入建成元吉至臨湖殿覺變
遽反走秦王隨呼之元吉引弓欲射不能殺者三秦王
射建成即死元吉中矢走敬德追殺之俄而東宮齊府
兵三千攻玄武門不得入接戰久之矢及殿屋王左
右數百騎至合擊之衆遂潰帝謂裴寂等曰事今奈何
蕭瑀陳叔達曰臣聞內外無限父子不親失而弗斷反
蒙其亂建成元吉自草昧以來未始與謀既立又無功

德疑貳相濟為蕭牆憂秦王功蓋天下內外歸心立為太子付軍國大務陛下釋重負矣帝曰此吾志也乃召秦王至慰撫之曰朕幾有投杼之惑秦王號泣不能止建成死年三十八長子承宗為太原王早卒承道安陸王承德河東王承訓武安王承明汝南王承義鉅鹿王皆坐誅詔除建成元吉屬籍其黨疑懼更相告廬江王瑗遂反乃下詔建成元吉瑗支黨不得相告許由是遂安太宗立追封建成為惠王謚曰隱以禮改葬詔東宮

舊臣皆會帝於宜秋門哭之以子福為後十六年追今
贈宇文穎者代人自李密所來降為農圃監封化政郡
公性貪昏與元吉厚善故豫文幹謀事敗帝責曰朕以
文幹叛故遣卿乃同逆邪穎無以對斬之

衛懷王玄霸字大德幼辯惠隋大業十年薨年十六無
子武德元年追王及諡又贈秦州總管司空以太宗子
泰為宜都王奉其祀葬芷陽泰徙封越更以宗室西平
王瓊子保定嗣薨無子國除

巢刺王元吉小字三胡高祖兵已西留守太原封姑臧
郡公進齊國總十五郡諸軍事加鎮北將軍太原道行
軍元帥帝受禪進王齊為并州總管初元吉生太穆皇
后惡其貌不舉侍媼陳善意私乳之及長猜驚好兵居
邊久益驕侈常令奴客諸妾數百人被甲習戰相擊刺
死傷甚衆後元吉中創善意止之元吉恚命壯士拉死
私謚慈訓夫人劉武周略汾晉詔遣右衛將軍宇文歆
助守元吉喜鷹狗出常載置網三十車曰我寧三日不

食不可一日不獵夜潛出淫民家府門不閉歆驟諫不
納乃顯表於帝曰王數出與寶誕縱獵蹂民田縱左右
攘歛畜產為盡每射於道觀人避矢以為樂百姓怨毒
不可與共守有詔召還元吉密諷民詣闕請乃得歸武
周以五千騎屯黃蛇嶺元吉使將軍張達以步卒百人
嘗寇達辭兵少彊之至則盡沒達怒導武周陷榆次元
吉保祁賊急攻之遁還并州賊張甚元吉給司馬劉德
威曰公以老弱守吾率銳士拒賊因齎寶物攜妻妾夜

出委軍奔京師并州陷帝怒自是嘗令從秦王征討不
復顓軍矣尋授侍中襄州道行臺尚書令稷州刺史秦
王國東都實建德來援王以精騎逆戰留元吉屈突通
守而世克易之輒出兵元吉設伏劫之斬首八百級禽
其將東都平拜司空賜充冕服鼓吹二部班劍二十人
黃金二千斤與太子秦王得三鑪鑄錢累進司徒兼侍
中并州大都督時秦王有功而太子不為中外所屬元
吉喜亂欲并圖之乃構於太子曰秦王功業日隆為上

所愛殿下雖為太子位不安不早計還踵受禍矣請為
殿下殺之太子不忍元吉數諷不已許之於是邀結宮
掖厚賂中書令封德彝使為游說帝遂疏秦王愛太子
元吉乃多匿亡命壯士厚賜之使為用元吉記室參軍
榮九思為詩刺之曰丹青飾成慶玉帛禮專諸元吉見
之弗悟也其典籤裴宣儼免官往事秦府元吉疑事泄
鵬殺之自是人莫敢言秦王嘗從帝幸元吉第伏護軍
宇文寶寢內將以刺王太子固止之元吉愠曰為兄計

於我何害突厥郁射設入圍烏城建成薦元吉北討乃
多引秦王府驍將秦叔寶尉遲敬德程知節段志玄與
行又籍秦府精兵並麾下帝知之不能禁元吉承間密
請害秦王帝曰是有定四海功殺之無名元吉曰王昔
平東都顧望不即西散金帛樹私惠豈非反邪帝不應
太子與元吉謀兵行吾與秦王至昆明池伏壯士拉之
以暴卒聞上無不信然後說帝付吾國吾以爾為皇大
弟而盡擊殺叔寶等率更令王胄

舊唐書作率更丞王胄

密以謀

告秦王王召僚屬謀皆曰元吉戾狠使得志且不能事
其兄往者護軍薛寶以元吉字合之其父成唐元吉喜
曰但除秦王取東宮如反掌耳為亂未克已復傾奪大
王不蚤正之社稷非復唐有秦王由是定計死年二十
四子承業為梁郡王承鸞漁陽王承獎普安王承裕江夏
王承度義陽王並伏誅貞觀初改葬追爵海陵郡王及
諡後改封巢以曹王明嗣

楚哀王智雲初名稚詮善射工書奕隋大業末從建成

寓河東高祖初建成走太原吏捕智雲送長安為陰世
師所害年十四武德元年追王及謚母萬貴妃性恭順
為帝所禮宮中事一一咨決三年以太宗子寬為嗣又
贈京州總管司徒寬早薨國除貞觀三年復以濟南公
世都子靈龜嗣歷魏州刺史為政威嚴盜賊不發鑿永
濟渠通新市百姓利之薨子福嗣降為公卒子承況嗣
神龍中為右羽林將軍同節愍太子死于難

荆王元景武德三年始王趙與魯鄴二王同封貞觀初

累遷雍州牧十年徙封荆明年詔荊州都督荆王元景
梁州都督漢王元昌徐州都督徐王元禮潞州都督韓
王元嘉遂州都督彭王元則鄭州刺史鄭王元懿絳州
刺史霍王元軌虢州刺史虢王鳳豫州刺史道王元慶
鄧州刺史鄧王元裕壽州刺史舒王元名幽州都督燕
王靈夔蘇州刺史許王元祥安州都督吳王恪相州都
督魏王泰齊州都督齊王祐益州都督蜀王愔襄州刺
史蔣王惲揚州都督越王貞并州都督晉王治秦州都

督紀王慎所任州刺史并功臣令世世襲會長孫无忌等固讓遂廢不行徙鄜州永徽初進位司徒賜實封至千五百戶房遺愛謀反坐子則與往還繫獄時吳王亦抵罪高宗謂大臣曰朕欲從公勾叔及兄死兵部侍郎崔敦禮曰陛下雖申恩不可詘天下法遂賜死久之追封沈黎王以渤海王奉慈子長沙嗣降為侯神龍初復王爵以孫元述舊唐書作封其孫述為嗣薨無子國除

漢王元昌初王魯累遷梁州都督後徙封漢有勇力善

騎射數觸執憲太宗手詔誨督乃怨望附太子承乾通
饋謝來朝京師宿東宮嘗有醜語又見帝側有宮人善
琵琶乃曰事成幸賜我承乾許之割臂血盟事敗帝弗
忍誅欲免死高士廉李勣等固爭不奉詔乃賜死國除
鄴悼王元亨貞觀二年授金州刺史之藩太宗憐其幼
思之數遣使為勞問賜金醪以娛樂之六年薨無子國
除

周王元方武德四年始王與鄭宋荊滕四王同封貞觀

三年薨無子國除

徐康王元禮性恭畏善騎射始王鄭即授鄭州刺史後徙王徐遷徐州都督為絳州刺史有治名璽書勞勉實封至千戶永徽中加司徒兼潞州刺史薨贈太尉冀州大都督陪葬獻陵三子茂為淮南王餘爵公茂險薄無行初元禮疾姬趙有美色茂逼烝之元禮切責茂恚屏侍衛藥膳曰為王五十年足矣何服藥為以不食薨茂嗣上元中事洩流死振州神龍初以茂子瑋嗣開元中

為宗正員外卿薨子延年嗣拔汗那王入朝廷年將以
女嫁之為右相李林甫劾奏貶文安郡別駕終餘杭司
馬國除永泰初延年擢黔中觀察使趙國珍言諸朝詔
以其子諷嗣王

韓王元嘉始王宋後改王徐為潞州刺史母昭儀宇文
述女也寵於高祖既即位欲立為后固辭元嘉以母寵
故特為帝愛後出諸子無及者在潞時年十五聞太妃
病涕泣不食居喪毀甚太宗數慰勉少好學藏書至萬

卷皆以古文字參定同異與弟靈夔友愛燕見終日如

布衣禮閨門修整當世稱之貞觀九年

吳縝糾謬云按本紀乃貞觀十

年今考舊書亦作貞觀十年

更封韓遷滑州都督

舊書作滑州都督

高宗末

為澤州刺史武后得政進授太尉徙定州刺史以霍王

元軌為司徒舒王元名為司空滕王元嬰開府儀同三

司魯王靈夔太子太師越王貞太子太傅紀王慎太子

太保外示尊寵而內將圖之垂拱中元嘉徙絳州刺史

與子譔及越王子沖糾合宗室同舉兵未發會武后詔

宗室朝明堂元嘉遣使告諸王曰大享後太后必盡誅
諸王不如先事起不然李氏無種矣乃為中宗詔督諸
王發兵冲即以此兵五千攻濟州而諸王倉卒兵不至遂
敗元嘉至京師謀泄后逼令自殺年七十詔改氏元嘉
魯王越王為虺元嘉六子訓潁川王詡武陵王

世系表
並作即

公 謀上黨公蚤卒譏黃公工為詞章孟利貞嘗稱其文

曰劉麟之周思茂不過也出為通州刺史辭疾歸且謀
應越王也謀通音律歷杭州別駕與譏俱死時籍没者

衆惟冲譔家書為多皆文句詳正祕府所不及神龍初
追復元嘉爵土以第五子訥嗣薨子叔瓌嗣歷國子司
業薨子煒嗣建中初改王鄆後懿宗以鄆王即位復改
嗣韓王云

彭思王元則字彞初王荆出為婺州刺史

舊書作豫州刺史

貞

觀十年徙王為遂州都督以冠服奢侈免久之為澧州
刺史更折節厲行薨贈司徒荊州大都督陪葬獻陵高
宗登望春宮過其喪哭之慟無子以霍王子絢嗣龍朔

中封南昌王薨子志陳嗣開元中為宗正卿

鄭惠王元懿始王滕貞觀中出為兗州刺史徙王厯鄭

潞絳三州刺史實封千戶喜經術數斷大獄務寬平高

宗嘉之璽詔褒錫薨贈司徒荊州大都督陪葬獻陵十

子長子璿嗣王為鄂州刺史

世系表作嗣王
遂州刺史璜

薨子希言

嗣開元中為右金吾大將軍再為太子詹事弟察言生

二子曰自仙翽自仙為楚州別駕生夷簡翽為陳留公

生宗閔璿弟琳安德郡公生擇言擇言生勉勉宗閔夷

簡皆位宰相別有傳時稱小鄭王後亦曰惠鄭王後以別鄭王亮云

霍王元軌武德六年始王蜀與幽漢二王同封後徙吳

按吳鎮糾謬謂王蜀徙吳高祖紀並作元璿因疑本傳缺載改名一事今考舊書及資治通鑑並稱元軌則是

本紀之訛而非傳有脫文也

多材藝高祖愛之太宗嘗問羣臣曰朕

子弟孰賢魏徵曰臣愚不盡知其能唯吳王數與臣言

未嘗不自失帝曰朕亦器之然卿以為前代孰比對曰

經學文雅漢河間東平也至孝行曾閔不能過帝由是

遇並厚詔納徵女為妃嘗從獵遇羣豕帝使射之筈不
虛穀豕為盡帝撫其背曰爾藝過人顧今無所施方天
下未定得若豈不用乎貞觀七年為壽州刺史高祖崩
去官毀瘠甚服除遂菜食布衣終身至忌日輒累晝不食
十年徙王厯絳徐定三州刺史實封至千戶所至閉閣
讀書以吏事委長史司馬謹慎未嘗與物忤數引見處
士劉玄平為布衣交或問王所長於玄平答曰無長問
者不解玄平曰人有短所以見長若王無所不備吾何

以稱之突厥寇定州元軌令開城門偃旗幟虜疑不敢
入夜遁州人李嘉運潛結賊詔窮誅支黨元軌以寇近
且強人心危但殺嘉運餘無所詰因自劾帝喜曰朕固
悔之非王之明幾失定王文操者與賊戰敗二子鳳賢
更以身蔽父得全二子死縣抑不為言元軌廉知之遣
使弔祭上其事詔贈鳳賢朝散大夫旌其閭元軌每朝
數上疏陳得失多所裨正帝尊重之有大事嘗家驛咨
建帝崩與侍中劉齊賢同知山陵事元軌淹練故事齊

賢歎曰是非吾等及已嘗遣國令督封租令請貿易取
羸答曰汝當正吾失反誅吾以利邪不納進司徒出為

襄青二州刺史越王敗坐嘗通謀徙黔州檻車載至陳

倉薨六子

舊書作有子七人

緒為江都王純安定王餘皆爵為

公緒有名譽為金州刺史誅神龍初並復官爵以緒孫

暉嗣王

世系表
失載

開元中為左千牛員外將軍

號莊王鳳字秀成始王璡為鄧州刺史俄徙王厯號豫

青三州刺史實封千戶喜畋游遇官屬尤嫚薨贈司徒

楊州大都督陪葬獻陵七子

按吳縝糾謬云及世系表風止六子而茂融第四本

傳稱七子且云次

長子翼嗣為平陽王薨子寓嗣寓無

子茂融未知孰是

子爵不傳次子茂融

按吳縝糾謬云傳及世系表俱作茂融那文傳傳及武后紀並云東

莞公融今考舊書亦無茂字則表及本傳誤也

以勇聞垂拱中為申州刺史黃

公譔與越王謀舉兵倚以為助時詔諸王公赴東都茂

融私問所親高子貢子貢報曰來必死乃稱疾不朝以

俟兵期及得越王書倉卒不能應僚屬勸白其書擢太

子右贊善大夫俄為黨屬所引誅中宗更以鳳孫邕嗣

王娶韋后妹累遷祕書監知隴右三使仗內諸廄徙王
汴未幾韋氏敗邕殺其妻送首於朝議者鄙之削爵貶
沁州刺史不事後復爵還戶二百累遷衛尉卿薨子巨
嗣巨剛銳果決略通書史好屬辭天寶五載出為西河
太守坐資給柳勣支黨貶義陽司馬明年御史中丞楊
慎矜得罪其附離史敬忠與巨善巨坐免官錮置南賓
郡召拜夷陵太守安祿山陷東京玄宗方擇將帥張洎
言巨有謀可屬大事召至京師楊國忠忌之謂人曰小

兒詎可使對天子踰月不得見帝知之召入禁中對合
旨帝大悅敕宰相與語久不得罷乃授陳留譙郡太守
攝御史大夫河南節度使明日謝帝驚曰何攝為即詔
兼御史大夫巨奏方艱難時賊多詐有如陛下召臣何
以取信乃折契授之俄兼統嶺南何履光黔中趙國珍
南陽魯炆三節度使事時炆戰數屈詔貶為果毅以來
瑱代之巨奏炆若能存孤城功足補過則何以處之帝
曰卿隨所處置巨至內鄉賊將畢思琛解圍走遂趣南

陽貶灵由白衣從軍其暮稱詔復職京師平拜留守兼御史大夫明年拜太子少師兼河南尹東畿採訪使征乘牛之出入市者斤所得佐用度然稍自盜沒其妃即張皇后從女弟內不睦巨選府縣官備使令妃亦引蒲博少年分黨招貨賄撓政事宗正卿李遵素私張發巨賊事貶遂州刺史會段子璋反道遂州巨倉卒不知所出即迎謁為子璋所殺子則之嗜學年五十餘尚執經太學嗣曹王臯薦之貞元二年繇睦王府長史遷左金

吾衛大將軍坐與從甥竇申善貶昭州司馬

道孝王元慶始王漢後徙陳出為趙州刺史貞觀十年
徙王授豫州刺史累實封千戶時諸王奉給薄於帝子
至數宴之大臣莫敢言十八年黃門侍郎褚遂良為太
宗從容言之不能行高宗時歷滑州刺史以治績聞數
蒙褒賜遷徐沁衛三州刺史事母謹及喪請躬修墳墓
詔不聽薨贈司徒益州都督陪葬獻陵九子誘為嗣王
臨淮為澧州刺史坐賊削爵更以次子詢之子微嗣終

宗正卿子鍊嗣廣德中亦至宗正卿

鄧康王元裕貞觀五年始王鄧十一年徙王始王及徙

皆與譙魏許密四王同封

按吳鎮糾謬云本紀貞觀五年二月已酉封弟元裕為鄧

王元名譙王靈夔魏王元祥許王元曉密王鄧康王傳
所書其始封皆是也至貞觀十一年則不然止書正月

丁亥徙封元裕鄧王元名舒王至六月己巳又書徙封

元祥江王而已其靈夔元曉本紀皆不載其徙封疑其
徙封則不同而元裕傳誤云徙封皆同也今考資治通
鑑及舊唐書皆載靈夔貞觀五年封魏王十年改封燕

王十四年改封魯王元曉貞
觀五年即封王本紀亦同

累實封至千二百戶好學

善談名理與典籤盧照隣為布衣交五為州刺史遷充

州都督薨贈司徒益州大都督陪葬獻陵無子以江王

子廣平公炅嗣薨子孝先嗣

世系表
失載

開元中為冠軍大

將軍

舒王元名始王譙後徙王高祖在大安宮太宗晨夕使

尚宮問起居元名纔十歲保媼言尚宮有品當拜元名

曰此帝侍婢耳何拜為太宗壯之曰真吾弟也及長矜

嚴疏財未嘗問家人生業歷五州刺史實封至千戶子

豫章王廩治江州有美政高宗以元名善訓子手詔褒

美又欲授元名大州辭曰臣忝屬籍豈以州郡為仕進
資邪治石州二十年數將山林有高蹈意垂拱中徙鄭
境接東畿諸王貴戚為刺史者縱家人暴百姓元名至
一革之為治廉威進加司空武后時竄為丘神勣所構
繫詔獄死元名坐遷利州尋被殺神龍初詔復官爵贈
司徒時少子郾國公昭已卒乃以竄子津嗣開元中為
左威衛將軍薨子萬世系表作左威
衛將軍津之孫嗣薨子藻嗣
魯王靈夔篤學善草隸通音律初王魏後王燕為幽州

都督已而徙王實封至千戶頻歷五州刺史遷太子太

師垂拱元年徙相州

舊書作
邢州

坐與越王謀起兵流振州

自殺子說為清河王早夭藹

按吳縝糾諤云世系表亦
作藹本紀垂拱四年殺范

陽郡王霽藹霽不同今考
舊唐書資治通鑑皆作藹

為范陽王知越王必敗白發其

謀得不誅歷右散騎常侍為酷吏所害神龍初悲追復王

爵以藹子道堅嗣道堅方嚴有禮法閨門肅如也七為

州刺史遷國子祭酒開元中選授汴州刺史河南道採訪

使州據水陸都會前後刺史多黷利唯道堅以清毅

稱入為宗正卿亮贈禮部尚書子宇嗣從玄宗至蜀為
右金吾將軍寶應初以皇子适封魯王更封宇為嗣鄒
王弟道暹封戴國公恭默自守以修山東婚姻故事數
任清職終尚書右丞

江安王元祥始王許後徙王四為州刺史實封至千戶
性庸迷所至營財產無厭時滕蔣號三王皆貪暴得其
府官者惡之不願行故時語曰寧向詹崖振白不事江
滕蔣號元祥魁大帶十圍食兼數人韓號魏亦鴻偉然

不逮也薨贈司徒并州大都督陪葬獻陵七子暉為永
嘉王有禽獸行誅死皎為武陽王餘皆爵公武后時多
及誅皎子叢以幼流死嶺表葬南安人號其冢為天孫
墓中宗立以從子欽嗣王又以皎封絕更取弟子繼宗
嗣既而以郡王不襲降澧國公

密貞王元曉貞觀中為虢州刺史實封至千戶徙澤州
薨贈司徒揚州都督陪葬獻陵子穎嗣為南安王薨子
勗嗣早薨神龍初以穎弟亮養子曇嗣開元五年更詔

元曉再從孫東莞郡公徹嗣

世系表
失載

徙封濮陽郡王歷

宗正卿金紫光祿大夫

滕王元嬰貞觀十三年始王實封千戶為金州刺史驕

縱失度在太宗喪集官屬燕飲歌舞狎昵廝養廵省部

內從民借狗求置所過為害以九彈人觀其走避則樂

城門夜開不復有節高宗以書切責曰朕以王至親不

忍致於法今署下上考冀媿王心久之遷洪州都督官

屬妻美者給為妃召逼私之後坐法削戶及親事帳內

之半謫置滁州起授壽州刺史徙隆州復不循法錄事
參軍事裴聿諫正其失元嬰梓辱之聿入計具奏帝遷
聿六品上階帝嘗賜諸王絳五百以元嬰及蔣王貪黷
但下書曰滕叔蔣弟不須賜給麻二車助為錢緡二王
大慙武后時進拜開府儀同三司梁州都督薨贈司徒
冀州都督陪葬獻陵子十八人長子脩舊書琦嗣為長
樂王餘爵公垂拱中六人死詔獄神龍初更以少子脩
琚子涉嗣

按舊書云以脩琦弟脩琚子涉嗣考
世系表無脩琚之名宜以新書為是開元中

授左驍衛將軍亮子湛然嗣從玄宗至蜀擢左金吾上將軍

欽定續通志卷一百八十二

欽定四庫全書

欽定續通志卷一百八十三

宗室傳

唐

三

太宗諸子

常山王承乾

鬱林王恪

千里

岷

琨

禕

濮王泰

庶人祐

蜀王愔

蔣王暉

之芳

越王貞

冲

紀王慎

琮

曹王明

畢道古

象古

太宗十四子文德皇后生承乾又生第四子秦高宗皇帝後宮生寬楊妃生恪又生第六子愔陰妃生祐王氏生憚燕妃生貞又生第十一子囂韋妃生慎後宮生簡楊妃生福楊氏生明

常山愍王

舊書作恒山王

承乾字高明生承乾殿即以命之武

德三年始王常山郡與長沙宜都二王同封俄徙中山太宗即位立為皇太子甫八歲特敏惠帝愛之在諒闇

使裁決庶政有大體後每行幸則令監國及長好聲色
慢游然懼帝秘其迹臨朝言諄諄必忠孝退乃與羣不
逞狎慢左右或進諫危坐斂容痛自咎飾非辯給諫者
拜答不暇故人人以為賢而莫之察後過惡漸聞宮臣
若孔穎達令孤德榮于志寧張玄素趙弘智王仁表崔
知機等皆天下選每規爭承乾帝必厚賜金帛欲以厲
其心承乾傲不悛往往遣人陰圖害之時魏王泰有美
名帝愛重而承乾病足不良行且懼廢與泰交惡泰亦

謀奪長各樹黨東宮有俳兒善姿首承乾嬖愛帝聞震怒收兒殺之坐死者數人承乾意為泰告怨甚內念兒不已築室圖其像贈官樹碑為起冢苑中朝夕祭承乾至其處裴回涕數行下愈怨懟稱疾不朝累數月又使戶奴數十百人習音聲學番人椎髻剪綵為舞衣尋撞跳劒鼓鞀聲通晝夜不絕造大銅鑪六熟鼎資治通鑑作八尺銅鑪六陽招亡奴盜取人牛馬親視烹燂召所幸所養共食之又好突厥言及所服選貌類番人被以羊裘辮髮

五人建一落張瓊舍造五狼頭纛分戟為陣繫幡旗設

穹廬自居使諸部斂羊以烹抽佩刀割肉相啗承乾身

作可汗死使衆號哭勢面奔馬環臨之忽復起曰使我

有天下將數萬騎到金城

資治通鑑作獵於金城西然注曰金城恐當作金河

後解髮委身思摩當一設顧不快邪左右私相語以為

妖又襃瓊為鎧列丹幟勒部陣與漢王元昌分統大呼

擊刺為樂不用命者披樹扶之或至死輕者輒腐之嘗

曰我作天子當肆吾欲有諫者我殺之殺五百人豈不

定又召壯士左衛副率封師進刺客張師政統干承基等謀殺魏王泰不克遂與元昌侯君集李安儼趙節杜荷饒臂血呻之謀以兵入西宮貞觀十七年齊王祐反齊州承乾謂承基等我宮西牆去大內正可二十步棘耳豈與齊州等會承基連齊王事繫獄當死即上變帝詔長孫无忌房玄齡蕭瑀李勣孫伏伽岑文本馬周褚遂良雜治廢為庶人徙黔州十九年死

按吳縝糾謬云本紀十八年十

二月壬寅庶人承乾卒與本傳差一年今考舊唐書作十九年資治通鑑及唐會要俱作十八年帝為

廢朝葬以國公禮子象為懷州別駕厥鄂州別駕開元
中象子適之為宰相贈還承乾始王象越州都督卯國
公

楚王寬武德三年出後楚哀王蚤薨貞觀初追封

鬱林王

舊唐書及世系
表皆作吳王

恪始王長沙俄進封漢貞觀二

年徙蜀

舊唐書作武德三年封蜀王今考新唐書帝紀
及資治通鑑皆載於貞觀二年恐係舊書之誤

與越燕二王同封不之國久乃為齊州都督帝謂左右

曰吾於恪豈不欲常見之但令早有定分使外作藩屏

吾百歲後庶兄弟無危亡憂十年改王吳與魏齊蜀蔣
越紀六王同徙封授安州都督帝賜書曰汝惟茂親勉
藩王室以義制事以禮制心外之為君臣內之為父母
今當去膝下不遺汝珍而遺汝以言其念之哉坐與乳
媼子博塞罷都督削封戶三百高宗即位拜司空梁州
都督恪善騎射有文武才其母隋煬帝女地親望高
中
外所向帝初以晉王為太子又欲立恪長孫无忌固爭
帝曰公豈以非已甥耶且兒英果類我若保護舅氏未

可知无忌曰晉王仁厚守文之良主且舉棊不定則敗
况儲位乎帝乃止故无忌常惡之永徽中房遺愛謀反
因遂誅恪以絕天下望臨刑呼曰社稷有靈无忌且族
滅四子仁瑋琨境並流嶺表顯慶五年追王鬱林為立
廟以河間王孝恭孫榮為鬱林縣侯以嗣神龍初贈司
空儲禮改葬

仁光宅中遇赦還適會榮以罪斥故得襲鬱林縣男

舊書

作鬱林縣侯

歷岳州別駕爵郡公嘗使江左州人遺以金拒

不納武后遣使者勞曰兒吾家千里駒更名千里自天授後宗室賢者多誅翦惟千里詭躁不情數進符瑞諸異物得免中宗反正改王成節愍太子誅武三思千里與其子天水王禧率數十人斬古延明門以入太子敗誅死籍其家改氏煥睿宗立詔還氏及官爵瑋早卒中宗追封朗陵王子袞出繼蜀王愔開元中以傍繼國改封廣漢郡王遷太僕卿同正員薨

琨武后時歷六州刺史皆有名聖歷中為嶺南招慰使

安輯反獠甚得其宜卒贈司衛卿神龍初贈張掖郡王
開元中以子禕貴追封吳王境神龍初封歸政郡王歷
宗正卿坐千里事貶南州司馬

禕少有志尚事繼母謹撫異母弟祇以友稱當襲封固
讓祇中宗嘉其志特封嗣江王以繼嗣後開元時亦以
傍繼徙信安郡王累為州刺史治嚴辦遷禮部尚書朔
方節度使初吐蕃據石堡城數盜塞詔禕與河西隴右
議攻取既到屯諏日進師或謂城險賊所愛必固守今

兵深入有如不捷吾軍必奔不如持重伺賊勢禕曰人臣之節豈憚險不進乎必衆寡不敵者吾以死繼之於是分兵遮賊路督諸將倍道進遂拔之自是河隴諸軍游奕拓地至千里玄宗喜更號其城曰振武軍契丹牙官可突干叛詔拜忠王為河北道行軍元帥討之敕禕以副王不行故禕率裴耀卿諸將分道出范陽北擊二蕃破之禽酋長以還餘部竄伏加開府儀同三司領關內支度營田採訪處置使授二子官禕功多執政害之

賞不讎為當時所恨久之擢兵部尚書為朔方節度大使坐事下除衢州刺史歷滑懷二州天寶初以太子少師致仕明年遷太師未拜薨禕治家嚴教子有法度故
峘嶧峴皆顯

峘性質厚歷官有美名以王孫封趙國公楊國忠亂政悉斥不附已者峘由考功郎中拜睢陽太守以清簡為二千石最方入計而玄宗入蜀即走行在除武部侍郎兼御史大夫俄拜蜀郡太守劔南節度採訪使郭千仞

反與陳玄禮共討平之上皇還京遷戶部尚書改越國
乾元元年持節都統江淮節度宣慰觀察使都統之號
自肅始明年宋州刺史劉展有異志詔拜展為淮南節
度使密詔肅與揚州長史鄧景山圖之時展强扈既受
詔即悉兵度淮肅景山拒之戰壽春敗績肅走丹陽詔
貶袁州司馬卒於官贈揚州大都督弟峴別有傳

祗封嗣吳王出為東平太守安祿山反河南陳留滎陽
靈昌相繼陷祗募兵拒戰玄宗壯之累遷陳留太守持

節河南道節度採訪使歷太僕宗正卿代宗大厯時祇
既宗室老以太子賓客為集賢院待制是時勲望大臣
無職事者皆得待詔於院給殮錢署舍以厚其禮自左
僕射裴冕等十三人為之子獻以蔭補五品官祇薨兄
岵得罪乃以獻嗣王累至宗正卿檢校刑部尚書薨贈
太子少保性介直面刺人短歷官清白居室不能庇風
雨收恤甥姪慈愛過人家無留儲公卿合購乃克葬
濮恭王泰字惠襄始王宜都徙封衛繼懷王後又徙封

越為揚州大都督再遷雍州牧左武侯大將軍改王魏
帝以秦好士善屬文詔即府置文學館得自引學士又
以秦大腰腹聽乘小輿至朝司馬蘇勗勸秦延賓客著
書如古賢王秦乃奏撰括地志於是引著作郎蕭德言
祕書郎顧胤記室參軍蔣亞卿功曹參軍謝偃等撰次
衛尉供帳光祿給食士有文學者多與而貴游子弟更
相因藉門若市然秦悟其過欲速成乃分道計州緡緝
疏錄凡五百五十篇歷四朞成詔藏祕閣所賜萬段後

帝幸秦延康坊第曲赦長安死罪免坊人一年租府僚以差賜帛又秦月稟過皇太子遠甚諫議大夫褚遂良諫曰聖人尊嫡卑庶謂之儲君故用物不會與王共之庶子不得為比所以塞嬖萌杜禍源先王法制本諸人情知有國家者必有嫡庶庶子雖愛不得過嫡子如當親者疏當尊者卑則私恩害公惑志亂國今魏王稟科過東宮議者以為非是昔漢竇太后愛梁王封四十餘城王築苑三百里治宮室為複道費用鉅萬出警言入蹕

一不得意遂發病死宣帝亦驕淮陽王幾至於敗輔以退讓之臣乃克免今魏王新出閣且當示以節儉自可在後月加歲增又宜擇師傅教以謙讓勉以文學就成德器此所謂聖人之教不肅而成也帝又敕泰入居武德殿侍中魏徵亦言王為陛下愛子欲安全之則不當使居嫌疑之地今武德殿在東宮之西昔海陵居之矣論者以為不可雖時與事異人之多言尚或可畏又王之心亦弗遑舍願罷之成王以寵為懼之美帝悟乃止

時皇太子承乾病蹇泰以計傾之乃引駙馬都尉柴令武房遺愛等布腹心而韋挺杜楚客相繼攝府事二人者為泰要結中朝臣津介賂遺羣臣更附為朋黨承乾懼陰遣人稱泰府典籤詣玄武門上封帝省之書言泰罪帝怒即遣捕詰不獲既而太子敗帝陰許立泰岑文本劉洎請遂立泰為太子長孫无忌固欲立晉王帝以太原石文有治萬吉復欲從无忌泰微知之因語晉王爾善元昌得無及乎王憂甚帝怪之以故對帝憮然悟

會召承乾譴責承乾曰臣貴為太子尚何求但為秦所圖與朝臣謀自安爾無狀之人遂教臣為不執事若秦為太子正使其得計耳帝曰是也有如立秦則副君可詭求而得使秦也立承乾治俱死治也立秦承乾可無它即幽秦將作監解雍州牧相州都督左武侯大將軍降王東萊

謹按通鑑輯覽

御批承乾之廢雖不盡由秦之構譏然其觀釁蓋非一日至云殺愛子以傳晉王燕以妻寵則肺肝如揭矣太宗以兩棄處之可謂得當然承乾輩之間牆與建成元吉如因詔出一轍幸未至玄武門之甚耳天道好還吁可畏哉

自今太子不道藩王窺望者兩棄之著為令然帝猶謂
无忌曰公勸我立雉奴雉奴仁懦得無為宗社憂奈何
雉奴高宗小字泰尋改王順陽居均州之鄖鄉帝嘗持
泰表語左右曰泰文辭可喜豈非才士我心念泰無已
時但為社稷計遣居外使兩相完也二十一年進王濮
高宗即位詔泰開府置僚屬車服羞膳異等薨鄖鄉年
三十五贈太尉雍州牧二子欣徽欣嗣王武后時為酷
吏所陷貶昭州別駕薨子嶠神龍初得嗣王開元中為

國子祭酒以罪貶鄧州別駕薨徽封新安郡王

庶人祐字贊武德八年王宜陽進王楚又王燕已乃封

齊領齊州都督貞觀十一年始歸國明年入朝以疾留

京師其舅尚乘直長陰弘智險人也說祐曰王兄弟多

即上萬歲後何以自全要須得士自助乃引客燕弘亮

舊書作引其妻兄燕弘信弘亮
弘信之兄也亦見舊書本傳 謁祐祐悅賜金帛使募

劍客十五年還州初帝用王府長史司馬必取骨鯁敢

言者有過失輒聞而祐溺羣小好弋獵長史薛大鼎屢

諫不聽帝以輔王無狀免之更用權萬紀萬紀性剛急

以法繩祐有咎君謩梁猛虎

舊唐書作梁猛彪

者騎射得幸萬

紀斥之祐私引與狎昵帝數以書讓祐萬紀恐并獲罪

即說祐曰王上愛子上欲王改悔故數教責王誠能飭

躬引咎萬紀請入朝言之上意宜解祐因上書謝罪萬

紀見帝言祐且自新帝悅厚賜萬紀而仍譙戒祐祐聞

萬紀見勞而已蒙責以為賣已益不平會萬紀又以疑

貳繫君謩等制祐不出國門悉暴祐罪於朝祐不勝忿

有詔刑部尚書劉德威臨訊頗實帝召祐萬紀還京師祐與燕弘亮等謀射殺萬紀支解之左右勸祐遂發兵乃募城中男子年十五以上悉發私署左右上柱國光祿大夫開府儀同三司托東托西等王斥庫貲行賞驅人築堞浚隍繕甲兵人惡之皆夜縋亡去詔兵部尚書李勣與劉德威發便道兵討之祐日夜引弘亮等五人對其妃宴樂語官軍則弘亮妄言王母憂右手持酒啗左手刀拂之祐信愛弘亮聞之喜帝手敕祐曰吾常戒

汝勿近小人正為此耳往吾子今國讎我上慙皇天下
愧后土題畢涕而遣祐檄諸縣縣輒以聞祐窮蹙上表
曰臣帝子也為萬紀讒構上天降靈罪人斯得臣狂失
心慙怍驚悸左右無兵即欲顛走所以頗仗械以自衛
護時勅未至而青淄等州兵已集或勸祐虜子女走豆
子毓為盜計未決兵曹杜行敏夜勒兵鑿垣入祐與弘
亮等閉門拒至日中行敏叫曰吾為國討賊不速降且
焚士積薪祐乃出執送京師賜死內侍省貶為庶人葬

以國公禮詔齊州給復一年擢行敏巴州刺史封南陽郡公祐喜養鬪鴨方未反狸齕四十餘絕其頭去及敗牽連誅死者凡四十餘人祐之亂州人羅石頭數祐罪以刀直前刺祐不克殺之詔贈亳州刺史嘗引騎徇邑聚野人高君狀曰上親平寇難土地甲兵不勝計今王以數千人為亂猶一手搖泰山又如君父何祐擊禽之愧其言不能殺詔擢榆社令

蜀悼王愔貞觀五年始王梁與郅漢申江代五王同封

按吳鎮糾謬云太宗紀貞觀五年同封者
六王今傳止云五王蓋脫晉王治一名也徙王蜀實封

八百戶出為岐州刺史數畋游為非法帝頗責教不悛
怒曰禽獸可擾於人鐵石可為器惜曾不如之乃削封
戶及國官半徙虢州久之還戶增至千復出馳弋敗民
稼典軍楊道整叩馬諫惜粹擊之御史大夫李乾祐劾
惜罪高宗怒貶黃州刺史擢道整匡道府折衝都尉吳
王恪得罪惜以母弟廢為庶人徙巴州俄封涪陵王薨
咸亨初復爵土贈益州大都督陪葬昭陵以子璠嗣王

璠武后時謫死歸誠州神龍初以朗陵王瑋子瑜嗣

璠原

文誤璠吳縝糾謬云當作朗陵王瑋子玢嗣今依世系表改璠從瑋瑜則玢之舊名也仍之

蔣王惲始王郟又徙王蔣拜安州都督賜實封千戶永

徽三年徙梁州惲造器物服玩多至四百車所經州縣

騷然護送為有司劾奏詔貸不問上元中遷箕州刺史

錄事參軍張君徹誣告惲反詔使者按驗惲惶懼自殺

高宗知其枉斬君徹贈惲司空荊州大都督陪葬昭陵

三子煒煌休道

按世系表載蔣王惲子十六人而本傳止云三子表載蔡國公煒本傳作煌被

此互
異 煒初王汝南郡憚薨遂嗣王為武后所害神龍初

以嫡孫紹宗為嗣蔣王薨子欽福嗣為率更令封蔡國
公孫之芳

之芳有令譽安祿山奏為范陽司馬安祿山反自拔歸
京師歷工部侍郎太子右庶子廣德初詔兼御史大夫
使吐蕃被留二歲乃得歸拜禮部尚書改太子賓客休
道子琚神龍初封嗣趙王開元中改王中山

越王貞始王漢後徙原已乃封越貞善騎射涉文史有

吏幹為宗室材王武后初遷累太子太傅豫州刺史

舊書

作蔡州

刺史

中宗廢居房陵貞乃與韓王元嘉及王子黃公

譔魯王靈夔王子范陽王藹霍王元軌王子江都王緒

及子琅邪王冲計議反正垂拱四年明堂成悉追宗室

行享禮共疑后遂大誅戮不遺種事且急譔乃矯帝璽

書賜冲曰朕幽繫諸王宜即起兵於是命長史蕭德琮

募兵告諸王師期八月冲先發諸王莫有應者獨貞將

兵攻上蔡破之而冲已敗貞稍徇屬縣得士七千列五

營貞為中營以裴守德為大將軍領中營趙成美為左
中郎將領左營閭弘道為右中郎將領右營安摩訶為
郎將領後軍王孝志為右將軍領前軍以韋慶禮為司
馬署官五百然脅誘無關志家童皆佩符以辟兵九月
后遣左豹韜衛大將軍麴崇裕夏官尚書岑長倩率兵
十萬討之以鳳閣侍郎張光輔為諸軍節度乃下詔削
貞父子屬籍改氏虺崇裕等次豫州貞少子規及裴守
德拒戰兵潰貞乃閉門守守德者驍勇士貞始起以女

妻之委以腹心至是欲殺貞自贖會軍薄城家人白貞
今事乃爾王豈受戮辱者邪即仰藥死規自殺守德與
主俱縊起凡二十日敗始貞臨水自鑒不見其首惡之
未幾及禍

沖貞長子也好學勇而才累遷博州刺史初發有士五
千渡河趣武水武水令告急魏州州遣莘令馬玄素領
兵先乘城沖攻之因風積薪焚其門火作風反衆心沮
解其屬董元寂誦言王與國家戰乃反爾沖斬以徇衆

懼遂漬惟家僮數十從之乃走博州為當關刺死后命

丘神勣討之兵未至冲已死起七日敗二弟蒨

蒨書作蒨世系

表作蒨

溫蒨常山公坐死溫以前告流嶺南初貞騰檄壽

州刺史趙瓌諭以興兵且假道瓌得檄許為應妻常樂

長公主亦趣諸王蚤立功故瓌與主皆死濟州刺史薛

顗駙馬都尉瓘之子母城陽長公主封河東縣侯紹尚

太平公主擢累右玉鈐衛員外將軍以主婿不加戮餓

死河南獄神龍初敬暉等奏冲父子死社稷請復爵土

為武三思等沮罷開元四年乃復爵土有司議以死不忘君謚曰敬五年又詔王嗣絕國除朕甚悼焉其以貞從孫故許王子夔國公琳嗣王

按世系表云
嗣越王存紹

奉王祀琳

薨爵不傳貞最幼息珍子謫嶺表數世不能歸開成中女孫持四世喪北還求祔王瑩詔嘉憫敕宗正寺京兆府為訪其兆非陪陵者聽葬女名元真為道士

紀王慎始王申後徙紀食戶八百貞觀中遷襄州刺史以治當最天子璽書勞勉人為立石頌德二十三年進

戶至千文明初累遷太子太師貝州刺史慎少好學善
星步與越王齊名當世號紀越初貞連諸王起兵慎知
時未可獨拒不與合將就誅而免改氏虺載以檻車詣

巴州薨于道七子續琮獻秀獻欽澄

按世系表紀王慎子尚有悲庄曠三

人獻作友獻獻作友獻並與傳異

續與秀最知名續王東平歷和州刺史薨

琮義陽王獻楚國公秀襄陽郡公獻廣化郡公欽

建平郡公五人並為武后所殺神龍初以澄嗣王

世系表云

副紀王定州刺史澄初名鐵誠

擢左驍衛將軍薨子行同嗣琮三子行

遠行芳行休始琮與二弟同死桂林開元四年行休請
身迎柩既至無封樹議者謂不可復得行休掃地布席
以祈是夜夢王乘舟舟判為二既而適野見東洲中斷
乃悟焉又靈堂鎖一夕莖自屈管上有指迹一竒二並
使卜人筮之曰屈於文為尸出指者示也一竒二並三
殞也先王告之矣乃趣其所發之如言而一節獨闕行
休號而寢夢琮告曰在洛南洲明日直殞南得之於是
以三喪歸陪葬昭陵贈琮陳州刺史永昌時行遠行芳

斥舊州六道使至行遠遂就戮行芳幼留赦抱持請代
遂與俱死西南人稱冤悌云慎女東光縣主始八歲聞
慎有疾不食父哀之紿云已愈主察顏色未平終不肯
御內外稱之長適太子司議郎裴仲將時妃主多恃貴
以奢豫相矜主獨儉素姊弟誚曰人生富貴在得志獨
勤苦欲何求答曰我幼好禮今行之不違非得志謂何
且自古賢妃淑女以恭遜著名驕縱敗德況榮寵貴盛
儻來物也可恃以凌人乎及王死號慟嘔血數升免喪

絕膏沐者二十年始諸王妃主自垂拱後被害者皆藁掩之神龍初詔州縣普加求訪祭以牲牢復官爵諸王皆陪葬昭獻二陵主聞感慟卒敕其子曰為我謝親戚酷憤已雪下見先王無恨矣中宗為舉哀章善門下詔褒揚江殤王璽封之明年薨無後

代王簡已封薨無後

趙王福貞觀十三年始王出後隱太子累遷梁州都督實封八百戶薨贈司空并州都督陪葬昭陵無子神龍

初以蔣王憚孫思順嗣王

曹王明母本巢王妃帝寵之欲立為后魏徵諫曰陛下不可以辰嬴自累乃止貞觀二十一年始王曹累為都

督刺史高宗詔出後巢王永隆中坐太子賢事降王零

陵徙黔州都督謝祐逼殺之帝聞悼甚黔官吏皆坐免

景雲中陪葬昭陵三子俊傑備

按世系表載曹王明子俊傑備外尚有价德二

人本傳

俊嗣王南州別駕傑為黎國公垂拱時並及誅

失載

神龍初以傑子肩為嗣曹王是時諸王子孫自嶺外還

入見中宗皆號慟帝為泣下初武后時壯者誅死幼皆沒為官奴或匿人間庸保至是相繼出帝隨屬遠近封拜云後備自南還詔停肩封而封備歷衛尉少卿同正員薨開元十二年復封肩薨子戢嗣位左衛率府中郎將子臯嗣

臯字子蘭少補左司禦兵曹參軍天寶十一載嗣王事母太妃鄭以孝聞安祿山反奉母逃民間間走蜀謁玄宗由都水使者遷左領軍將軍上元初旱歟臯祿不足

養請補外不許乃故抵輕法貶温州長史俄攝州事州
大饑發官稟數十萬石賑餓者既貸乃自劾優詔許
就進少府監時殿中侍御史李鈞與其弟京兆法曹參
軍鏐官既遂不肯還鄉母窮不自給臯行縣見之歎曰
入則孝出則弟有餘力則學若二子者可與事君乎哉
舉劾之並銅死

舊書作改處州
別駕行州事

召還未得見即上書言

治道詔授衡州刺史為觀察使謾劾貶潮州會楊炎起
道州為宰相知臯直復用為衡州刺史初御史覆訊臯

懼憂其母出則囚服入乃衣冠貌言如平常及為潮以遷入告至是復位乃言其實建中元年進拜湖南觀察使前帥辛京果貪虐使部將王國良戍武岡賴其富即劾以死國良恐據縣反斂荆黔洪桂兵討之再歲不能下臯至遺書曰觀將軍非敢大逆者特逃讒抗死爾將軍遇我可以降我因為京果誣者幸蒙雪何忍以兵加將軍哉以為不然我以陣術破將軍陣以攻法屠將軍城非將軍所度也國良得書喜且畏因請降然內尚首

鼠臯即日單騎稱使者造國良壘賊延使者入臯大呼
其軍曰有識曹王者乎乃我也來受良降良令安在一
軍愕眙不敢動國良迎拜叩頭請罪臯執手約為昆弟
則盡焚攻守具散其兵有詔赦之賜名惟新明年持母
喪至江陵會梁崇義反奪為左衛大將軍復觀察湖南
李希烈反遷江西節度使受命日不宿家至豫章大令
將吏曰有功未申與懷器謀不發者皆自言得裨校伊
慎李伯潛劉旻悉補大將擢王錡為中軍以馬彞許孟

容為幕府治戰艦裒兵二萬以士二千五百委慎等教之自將五百人教以秦兵團力法聯其賞罰弛張如一乃約以五百擊慎卒二千五百莫能當其鋒即盡以教之初慎常從希烈平襄州至是希烈懼為臯用即反間德宗信之將誅慎臯請赦之使自效會與賊夾江陣臯勉慎立功以所乘馬及其鎧賜之使將先鋒斬賊數百級乃免賊柵蔡山不可攻臯聲言西取蘄引兵艦循厓沂江上賊聞以羸師保柵悉軍行江北與臯直西去蔡

山三百里臯遣步士悉登舟順流下攻蔡山拔之間一
日賊救至大敗乃取蘄州降其將李良平黃州兵益振
會舒王為元帥授臯前軍兵馬使俄而天子狩奉天鹽
鐵使包佶為陳少游所窘以運槽泝次蘄口希烈使杜
少誠將步騎三萬將絕江道臯遣伊慎兵七千禦於永
安走之以功進工部尚書帝駐梁州臯之貢助相望以
天子處外乃不敢居城府出屯西塞山大洲徙郡縣為
軍市改戶部尚書

舊書作工部尚書

又遣伊慎王錡攻安州未

下希烈遣劉戒虛以步騎八千援之。舉命李伯潛迎擊於應山，俘之。遂下安州，斬偽刺史王嘉祥。希烈別遣兵援隋州，舉破之。屬鄉因下平靜，白雁關賊遂不敢南畧。遷荆南節度使，賜實封三百戶。凡戰大小三十二，取州

五縣二十，斬首三萬三千，禽生萬六千。

按舊書凡下州四縣十七大小

十餘陣而韓愈、曹成王碑云大小之戰三十有二，取五州十九縣，與二書又不皆合也。未嘗敗師。

所遇不敢伐桑棗，踐禾稼，朝廷仰食江淮，而西道出九江至大別，皆與賊接。舉轉戰數千里，餉路遂通江漢，倚

皋為固淮西平乃請護喪歸東都帝遣中人賁弔訖葬
來朝還就鎮初江陵東北傍漢有古郭不治歲輒溢皋
修塞之得其下良田五千頃規江南廢洲為廬舍構二
橋跨江而流人自占者二千餘家繇荊州抵樂鄉二百
里其間壩聚凡數十不井飲皋始命鑿井以便人貞元
初吳少誠擅蔡故徙皋鎮山南東道割隋汝以益軍

按方
鎮表

云增領店節
安與本傳異

練兵峙糧市回鶻馬以益戰騎歲時大畋

以教士少誠畏之皋性勤儉能知人疾苦參聽微隱盡

得吏下短長其賞罰必信所至常平物估豪舉不得擅其利教為戰艦挾二輪蹈之鼓水疾進駛于陣馬有所造作皆用省而利長以物遺人必自視衡量庫帛皆印署以杜吏謾扶風馬彞未知名舉識之卒以正直稱張東之有園圃在襄陽舉嘗宴集將市取之彞曰漢陽有中興功今遺業當百世共保柰何使其子孫鬻乎舉謝曰主吏失詞以為君羞微君安得聞此言卒年六十贈尚書右僕射諡曰成舉嘗自創意為散器以槩木上出

五觚下銳圓為孟形所容二豆少則水弱多則彊中則水器力均雖動搖乃不覆云子象古道古

象古元和中自衡州刺史擢安南都護貪縱不法驩州刺史楊清蠻酋也象古忌其豪召為牙門將常鬱鬱思亂會討黃賊象古發甲助之乃授清兵三千清與子志烈還襲安南殺象古并其家詔赦清為瓊州刺史以桂仲武為都護清拒命仲武分諭渠酋兵皆附破城斬清夷其族

道古舉進士獻書闕下擢校書郎集賢院學士累遷司
門員外郎歷利隋唐睦四州刺史柳公綽鎮鄂岳為飛
譖上聞憲宗欲代之裴度言嗣曹王舉嘗能以江漢兵
制李希烈威惠在人今以其子將必有功會道古自黔
中觀察使入朝乃代公綽倍道入其軍公綽惶遽出財
貨皆被奪元和十二年攻申州破其郭進圍中城守卒
夜驅女子登而譟發懸門以出道古衆亂多死於賊李
聽守安州未嘗敗道古誣逐之

按吳縝糾謬云柳公綽
傳元和十一年為李道

古代還除給事中並無飛語及道古迫逐之事又李聽傳云徙安州會觀察使柳公綽方討蔡以聽典軍聲振賊中召為羽林將軍亦無道古迫逐之事今考舊書李肇傳惟不載飛語上聞之事餘皆同自將出

木陵

舊書作穆陵

關士卒驕不能制又度支錢道古悉以饋

權倖故士不給其下怨怒戰不甚力賊亦易之故再入

申不能下卒無功淮西平加檢校御史大夫詔為宗正

卿左金吾將軍帝喜服餌道古欲自媚而所善柳泌自

謂能化金為不死藥乃因宰相皇甫鏘以聞俄會帝崩

穆宗為太子惡之既立誅泌貶鏘斥道古為循州司馬

終以服丹嘔血死長慶初詔還其官道古巧于宦便佞
傾下游公卿間常與奕博偽不勝厚進所償嗜利者多
得其懽心故少盜美名及死賣宅以葬

欽定續通志卷一百八十三

欽定四庫全書

欽定續通志卷一百八十四

宗室傳

唐

四

高宗諸子

燕王忠

澤王上金

許王素節

璆

孝敬皇帝弘

章懷太子賢

守禮
承宏

承宏

中宗諸子

懿德太子重潤

譙王重福

節愍太子重俊

殤皇帝重茂

睿宗諸子

讓皇帝憲

璿
景儉
瑞

莊惠太子撫

惠文太子範

珍

惠宣太子業

知柔

高宗八子後宮劉生忠鄭生孝楊生上金蕭淑妃生素
節武后生弘賢中宗皇帝睿宗皇帝

燕王忠字正本帝始為太子而忠生貞觀二十年始王

陳永徽初拜雍州牧王皇后無子后舅柳奭說后以忠
母微立之必親已后然之請於帝奭又與褚遂良韓瑗
長孫无忌于志寧等繼請遂立為皇太子后廢武后子
弘甫三歲許敬宗希后旨建言國有正嫡太子宜同漢
劉彊故事於是降封梁王梁州都督賜甲第實封戶二
千物二萬段俄徙房州刺史忠寢懼不聊生至衣婦人
衣備刺客數有妖夢嘗自占事露廢為庶人囚黔州承
乾故宅麟德初宦者王伏勝得罪於武后敬宗乃誣忠

及上官儀與伏勝謀反賜死年二十二無子明年太子
弘表請收葬許之神龍初追封贈太尉揚州大都督
原悼王孝永徽元年始王許與杞雍二王同封早薨神
龍初追封及謚

澤王上金始王杞永徽三年遙領益州大都督歷鄜壽
二州刺史文明元年徙王畢又徙王澤歷五州刺史載
初中武承嗣諷周興誣上金素節謀反召繫御史獄上
金聞素節已被殺即雉經七子並流死顯州神龍初追

還官爵以子義珣嗣王義珣始被謫匿身為傭保而嗣
許王瓘利其爵邑告義珣假冒復流嶺外開元初以素
節子璆為後而王真公主表義珣實上金子乃奪璆爵
復使義珣嗣王拜率更令薨子憑嗣

許王素節始王雍授雍州牧方羈州即誦書日千言師
事徐齊暉淬勉自彊帝愛之轉岐州刺史更王郇母被
譖死出素節為申州刺史乾封初詔素節病無入朝而
實不病乃著忠孝論自明倉曹參軍張柬之以聞欲帝

省其誣武后滋不悅坐受賕降王鄱陽削封戶什七徙

置袁州錮終身儀鳳三年

舊書作永隆元年

為岳州刺史更王

葛又徙王厯三州刺史與上金同追逮赴都至龍門驛

被縊年四十三葬以庶人禮子瑛等九人並誅惟琳瓘

璆欽古尚幼長囚雷州中宗復位追故封又贈開府儀

同三司許州刺史陪葬乾陵詔瓘嗣王實封戶四百開

元初封琳為嗣越王璆嗣澤王琳至右監門衛將軍子

隨封夔國公瓘為衛尉卿以抑上金子不得封貶鄂州

別駕因詔外繼嗣王者皆歸宗乃以嗣江王禕為信安王嗣蜀王禕為廣漢王嗣密王徹為濮陽王嗣曹王臻為濟國公嗣趙王瑀為中山王武陽王繼宗為澧國公
權累遷太子詹事薨贈蜀郡大都督二子解需皆幼以
璆子益嗣天寶十四載解始襲封王

璆初封嗣澤王降為郢國公官宗正光祿卿進封襄信
王天寶初復拜宗正卿性友悌聰敏宗子有一善無不
薦延故宗室在省闈者多璆所啟薨贈江陵郡大都督

三子謙與益謙為郢國公梓州刺史與汝南郡公欽古
封巴國公子賁嗣

孝敬皇帝弘永徽六年始王代與潞王同封顯慶元年
立為皇太子受春秋左氏於率更令郭瑜至楚世子商
臣弒其君喟而廢卷曰聖人垂訓何書此邪瑜曰孔子
作春秋善惡必書褒善以勸貶惡以誡故商臣之罪雖
千載猶不得滅太子曰然所不忍聞願讀它書瑜請改
受禮太子曰善四年加元服又命賓客許敬宗右庶子

許圜師中書侍郎上官儀中舍人楊思儉

按吳縝糾謬云藝文志慙

山玉彩注曰太子少師許敬宗司議郎孟利貞崇賢館學士郭瑜顧膺右史董思恭等撰姓氏與傳不同未知

孰是即文思殿摘采古今文章號搖山玉彩

吳縝糾謬傳搖山玉彩

及裴光庭傳搖山往則搖字並從木藝文志並從手未知孰是今按山海經云祝融生太子長琴是處搖山始作樂風搖亦作瑤則字宜從木也

凡五百篇書奏帝賜物三萬段餘臣

賜有差又詔五日一赴光順門決事總章元年釋菜國

學請贈顏回為太子少師曾參太子少保制可會有司

以征遼士亡命及亡命不即首者身殊死家屬沒官弘

請條別其科無使淪胥詔可帝幸東都詔監國時關中

饑弘視廡下兵食有榆皮蓬實者悄然命家令寺給米

義陽宣城二公主以母故幽掖廷四十不嫁

按吳縝糾謬云高宗

以貞觀二年戊子歲生至孝敬皇帝薨時止四十八歲耳何緣有四十歲之女乎此史臣已甚之詞也

弘

聞驚惻建請下降武后怒即以當上衛士配之由是失

愛弘仁孝賓禮大臣未嘗有過而后將驍志弘奏請數

拂旨上元二年從幸合璧宮遇酖薨年二十三

原文作二十四

按吳縝糾謬云弘以癸丑歲生至上元二年歲在乙亥止二十三年不得云二十四也今改正

天下莫

不痛之詔謚為孝敬皇帝葬緱氏墓號恭陵制度盡用
天子禮百官從權制三十六日釋服妃薨謚哀皇后無
子永昌初以楚王隆基嗣中宗立詔以主祔太廟號義
宗開元中有司奏孝敬皇帝宜建廟東都以謚名廟詔
可於是罷義宗號妃即裴居道女有婦德而居道以妃
故拜內史納言歷太子少保翼國公為酷吏所陷下獄
死

章懷太子賢字明允容止端重少為帝愛甫數歲讀書

一覽輒不忘始王潞歷幽州都督雍州牧徙王沛累進

揚州大都督右衛大將軍更名德徙王雍仍領雍州牧

涼州大都督實封千戶上元二年

原文作元年按吳縯糾謬云高宗紀及三宗

諸子傳並云皇太子以上元二年薨獨此傳以為元年蓋誤也今改正

復名賢是時皇太

子薨其六月立賢為皇太子俄詔監國賢於處決尤明

審朝廷稱焉帝手敕褒賜賢又招集諸儒左庶子張大

安等共注范曄後漢書書奏帝優賜段物數萬時正諫

大夫明崇儼以左道為武后所信崇儼言英王類太宗

而相王貴賢聞惡之宮人或傳賢乃后姊韓國夫人所
生賢益疑而后撰少陽政範孝子傳賜賢數以書讓責
賢愈不安調露中天子在東都崇儼為盜所殺后疑出
賢謀遣人發太子陰事詔薛元超裴炎高智周雜治之
獲甲數百首於東宮帝素愛賢薄其罪后曰賢懷逆大
義滅親不可赦乃廢為庶人焚甲天津橋坐徙者十餘
人開耀元年徙賢巴州武后得政詔左金吾將軍丘神
勣檢衛賢弟迫令自殺年三十四后舉哀顯福門貶神

勸壹州刺史追復舊王神龍初贈司徒遣使迎喪陪葬

乾陵睿宗立追贈皇太子及諡三子光順守禮守義光

順為樂安王

舊書作安樂郡王

徙義豐被誅守義為犍為王徙

封桂陽

世系表及舊書並作永安郡王

薨先天中追封光順王守義

畢王

守禮嗣王始名光仁授太子洗馬武后革命畏疾宗室

而守禮以父得罪與睿宗諸子閉處宮中十餘年睿宗

封相王許出外邸於是守禮等始居外改司議郎中宗

即位復故封拜光祿卿實封戶五百韋后攝政進封邠王睿宗立兼檢校左金吾衛大將軍出為幽州刺史遷兼單于大都護遷司空開元初累為州刺史後還諸王京師守禮以外支為王不甚才而多寵嬖子六十

餘人

舊書云男女六十餘人

無可稱者岐王嘗奏守禮知雨暘帝

問故答曰臣無它當天后時太子被罪臣幽宮中歲被敕杖凡四三累創痕膚前雨則沈懣霽則佳以此知之因泣下帝為惻然薨年七十贈太尉子承宏承寧承寀

可記者

承宏爵廣武王坐交非其人貶房州別駕還為宗正卿
廣德元年吐蕃入京師天子如陝吐蕃宰相馬重英立
承宏為帝以翰林學士于可封霍瓌為宰相賊退詔放
承宏于華州死承寧封嗣邠王

承宏燉煌王拜宗正卿與僕固懷恩使回紇和親即納
其女為妃封毗伽公主薨贈司空唐制嗣郡王加四品
階親王子服緋開元中張九齡奏寧薛及邠王三子為

王者賜紫餘皆服緋官不越六局郎王府掾屬仍員外
置後從帝至蜀者皆服紫

中宗四子韋庶人生重潤後宮生重福重俊殤帝

懿德太子重潤本名重照避武后諱改焉帝為皇太子
時生東宮高宗喜甚乳月滿為大赦天下改元永淳是
歲立為皇太孫開府置官屬帝問吏部侍郎裴敬彞郎
中王方慶對曰禮有嫡子無嫡孫漢魏太子在子但封
王晉立愍懷子為皇太孫齊立文惠子為皇太孫皆居

東宮今有太子又立太孫於古無有帝曰自我作古若何對曰陛下肇建皇孫本支千億之慶帝說中宗失位太孫府廢貶庶人別囚之帝復位封邵王大足中張易之兄弟得幸武后或譖重潤與其女弟永泰郡主及主壻竊議后怒杖殺之年二十

原文作年十九按吳縝糾謬云本傳言重潤生改元

永淳歲在壬午大足止有元年歲在辛丑則是已二十年也今改正

重潤秀容儀以孝愛

稱誅不緣罪人皆流涕神龍初追贈皇太子及謚陪葬

乾陵號墓為陵

譙王重福高宗時王唐昌郡徙封平恩長安末乃進王
神龍初韋庶人譖與張易之兄弟陷重潤貶濮州員外
刺史徙合均二州不領事景龍三年中宗親郊赦天下
十惡者咸宥流人得還重福不得歸自陳蒼生皆自新
而一子擯棄皇天平分固若此乎不報韋后得政詔左
屯衛大將軍趙承恩薛思簡以兵護守睿宗立徙集州
未行洛陽男子張靈均說重福曰大王居嫡長當為天
子相王雖平大難安可越居大位王若陰幸東都殺留

守擁兵西據陝徇河南河北天下可圖也重福乃遣靈均與其黨鄭愔計愔亦密招重福為天子豫尊睿宗為皇季叔重茂皇太弟制稱中元克復元年愔自署左丞相知内外文武事以靈均為右丞相天柱大將軍知出征事其餘以次除署重福自均州與靈均乘驛趨東都舍駙馬裴巽家洛陽令候巽重福驚遽出欲劫左右屯營兵至天津橋願從者數百人侍御史李邕遇之先馳至右屯營呼曰譙王得罪先帝擅入都為亂公等勉立

功取富貴稍稍閉皇城諸門以拒重福徇右營不能動
趨左掖門已闔怒縱火燒之左營兵寢逼衆遂潰重福
走山谷留守裴談總兵大索投漕渠死年三十一磔其
屍帝詔以三品禮葬

節愍太子重俊聖歷三年王義興神龍初王衛拜洛州
牧實封千戶俄領揚州大都督明年為皇太子重俊性
明果然少法度既楊瓌武崇訓為賓客二人馮貴寵無
學術惟狗馬蹴鞠相戲昵左庶子姚珽數上疏諍導右

庶子平貞慎又獻孝經議養德等傳太子納而不克用
武三思挾韋后勢將圖逆內忌太子而崇訓又三思子
尚安樂公主常教主辱重俊以非韋出詈為奴數請廢
自為皇太女三年七月重俊恚忿遂率李多祚洎左羽
林將軍李思沖李承況獨孤禪之沙吒忠義矯發左羽
林及千騎兵殺三思崇訓并其黨十餘人使左金吾大
將軍成王千里守宮城自率兵趨肅章門斬關入索韋
后安樂公主上官昭容所在后挾帝升玄武門宰相楊

再思蘇瓌李嶠及宗楚客紀處訥統兵二千餘人守太極殿帝召右羽林將軍劉仁景等率留軍飛騎百人拒之多祚兵不得進帝據檻語千騎曰爾乃我爪牙忽為亂能斬賊者有賞於是士倒戈斬多祚餘黨潰重俊亡入終南山欲奔突厥楚客遣果毅趙思慎追之重俊憩于野為左右所殺詔殊首朝堂獻太廟并以告三思崇訓樞睿宗立加贈諡陪葬定陵初重俊被害官屬莫敢視惟永和丞寧嘉勗號哭解衣裹其首時人義之楚客

怒收付獄貶平興丞卒至是亦贈永和令重俊子宗暉
景雲三年封湖陽郡王天寶中至太常員外卿薨

殤皇帝重茂初王北海神龍初進王溫授右衛大將軍
領并州大都督中宗崩韋后立重茂為帝而自臨朝稱
制韋氏貶重茂遂遜位讓叔父相王退居別所景雲二
年改王襄遷集州令中郎將率兵守衛開元二年轉房
州刺史薨年十七葬武功西原

按新書不為重茂立傳
吳縝糾謬力言其非今

依舊書

增入

睿宗六子肅明皇后生憲宮人柳生撫昭成皇后生玄宗皇帝崔孺人生範王德妃生業後宮生隆悌

讓皇帝憲始王永平文明元年武后以睿宗為皇帝故憲立為皇太子睿宗降為皇嗣更冊為皇孫與諸王皆出閣開府置官屬長壽二年降王壽春與衡陽巴陵彭

城三王同封

按吳縝糾謬云據武后紀當云與衡陽臨淄巴陵彭城四王同封而止云三王者脫

誤也或謂臨淄即明皇帝史家不欲列之降封之數縝亦非之今姑仍其舊

復詔入閣中宗

立改王蔡固辭不敢當韋后攝政進封宋睿宗將建東

宮以憲嫡長又嘗為太子而楚王有大功故久不定憲
辭曰儲副天下公器時平則先嫡國難則先功重社稷
也使付授非宜海內失望臣以死請因涕泣固讓時大
臣亦言楚王有定社稷功且聖庶抗嫡不宜更議帝嘉
憲讓遂許之立楚王為皇太子以憲為雍州牧揚州大
都督太子太師實封至二千戶賜甲第進尚書右僕射
又兼司徒讓司徒更為太子賓客時太平公主有異圖
姚元崇宋璟白帝請出憲及申王成義為刺史以銷釋

陰計乃以司徒兼蒲州刺史進司空玄宗既討定蕭岑之難進憲位太尉增千戶固辭更授開府儀同三司解太尉揚州大都督徙王寧又兼太常卿開元十四年表解卿久之復為太尉歷澤岐涇三州刺史累封至五千五百戶二十九年薨初帝五子列第東都積善坊號五王子宅及賜第上都隆慶坊亦號五王宅玄宗為太子嘗製大衾長枕將與諸王共之睿宗知喜甚及先天後盡以隆慶舊邸為興慶宮而賜憲及薛王第於勝業坊

申岐二王居安興坊環列宮側天子於宮西南置樓其
西署曰花萼相輝之樓南曰勤政務本之樓帝時時登
之聞諸王作樂必亟召升樓與同榻坐或就幸第賦詩
燕嬉賜金帛侑歡時以鵲鴿千數集麟德殿廷樹翔棲
浹日左清道率府長史魏光乘作頌以為天子友悌之
祥帝喜亦為作頌憲尤謹畏未嘗干政而與人交帝益
信重後申王等相繼薨唯憲在帝親待愈益厚薨六十
三帝失聲號慟左右皆泣下帝以憲實推天下有高世

之行非大號不稱乃追諡讓皇帝遣尚書左丞相裴耀卿太常卿韋縉持節奉冊其子璉表陳憲宿素退讓不敢當大號制不許及歛出天子服一稱詔右監門大將軍高力士以手書寘靈坐贈妃元氏為恭皇后葬橋陵旁及葬敕中使諭璉等送終之具使衆見之示以儉薄既發引大雨有詔慶王潭等涉途泥步送十里號其墓曰惠陵憲常從帝按舞萬歲樓從複道上見衛士已食棄其餘竇中帝怒詔高力士杖殺之憲從容曰從複道

上窺人之私恐士不自安且失大體豈以性命輕於餘
殮乎帝遽止謂力士曰王於我可謂有急難也不然且
誤殺士又涼州獻新曲帝御便坐召諸王觀之憲曰曲
雖佳然宮離而不屬商亂而暴君卑逼下臣僭犯上發
於忽微形於音聲播之詠歌見於人事臣恐一日有播
遷之禍帝默然及安史亂世乃思憲審音云憲本名成
器避昭成太后諡與申王成義俱改今名憲子十人

按世系表憲九子璿嗣莊璿珣璿玢璿瑒璿璫璿璘璿璚凡
十子琳下有靖原文誤作十九人今改從舊書其聞

者璉嗣莊琳瑤

璉眉宇秀整性謹潔善射帝愛之封汝陽王歷太僕卿
與賀知章褚庭誨梁涉等善薨贈太子太師嗣莊幼有
令名為太子左諭德封濟陰王薨贈幽州大都督琳以
祕書監為嗣寧王從天子幸蜀薨

瑤早有材望偉儀觀始封隴西郡公從帝幸蜀至河池
封漢中王山南西道防禦使乾元初寧國公主降回紇
詔瑤以特進太常卿持節冊拜回紇為威遠可汗肅宗

詔收羣臣馬助戰瑤與魏少游等持不可帝怒貶蓬州長史薨贈太子太師諡曰宣孫景儉

景儉字寬中及進士第彊記多聞善言古成敗王霸大略高自負於士大夫無所屈王叔文等更譽之以為管仲諸葛亮比叔文敗景儉以母喪得不坐韋夏卿守東都辟幕府竇羣任中丞引為監察御史羣貶景儉亦為江陵戶曹參軍累擢忠州刺史元和末入朝不見用復為澧州刺史素與元稹李紳善二人方在翰林言其才

及延英奉辭景儉自陳見抑遠穆宗憐之追詔為倉部
員外郎不遣閱月拜諫議大夫性矜誕使酒縱氣語侵
宰相蕭俛段文昌訴于帝貶建州刺史稹得君為之助
故還為諫議大夫與馮宿楊嗣復溫造李肇等集史官
獨孤郎所景儉醉至中書慢罵宰相王播崔植杜元穎
更為遜言厚謝乃去坐貶漳州刺史宿等皆逐矣未及
漳稹輔政改楚州刺史議者謂景儉辱丞相貶未至即
遷非是稹懼改少府監悉還宿等景儉既湮阮不得志

卒然其為人輕財篤於義旣沒士悵悼之

惠莊太子撫本名成義垂拱三年始王恒與衛趙二王
同封俄改王衡陽睿宗立進王申與岐薛二王同封累
遷右衛金吾二大將軍實封至千戶進司徒兼益州大
都督四為州刺史開元八年停刺史復為司徒薨冊書
贈太子及諡陪葬橋陵撫性寬裕儀貌瓌重無嗣詔以
讓帝子珣嗣為懷寧王徙封同安薨天寶中復以讓帝
子璿嗣

惠文太子範始名隆範玄宗立與薛王隆業避帝諱去
二名初王鄭改封衛俄降封巴陵進王岐為太常卿并
州大都督左羽林大將軍從玄宗誅太平公主以功賜
封與薛王業並滿五千戶歷為州刺史遷太子太傅開
元十四年薨冊書贈太子及謚陪葬橋陵帝哭之慟徹
常膳至累旬羣臣勉請乃復範好學工書愛儒士無貴
賤為盡禮與間朝隱劉延琦張諤鄭繇等善常飲酒賦
詩相娛樂又聚書畫皆世所珍者初隋亡禁內圖書湮

放唐興募訪稍稍復出藏祕府長安初張易之奏天下
善工漢治乃密使摹肖殆不可辨竊其真藏于家既誅
悉為薛稷取去稷又敗範得之後卒為火所焚駙馬都
尉裴虛已善識緯坐私與範游徙嶺南延琦貶雅州司
戶諤為山荏丞然帝於範無少間也時王毛仲等起賤
微暴貴諸王見必加禮獨範接之自如子瑾嗣落魄魄不
飭名檢沈酒色歷太僕卿封河東王暴薨贈太子少師
世系表尚有
河西郡王玠天寶中復以薛王子略陽公珍為嗣岐王

珍儀觀豐偉為宗正員外卿與蔚州鎮將朱融善融嘗
言珍似上皇因有陰謀往語金吾將軍邢濟曰關外寇
近京師草草奈何濟曰我金吾天子押衙以死生從安
自脫融曰見嗣岐王無慮矣濟以聞肅宗詔廢珍為庶
人賜死融黨皆誅擢濟為桂管防禦使

惠宣太子業始王趙降封中山授都水使者徙彭城兼
陳州別駕進王薛為羽林大將軍荊州大都督以好學
授祕書監開元初進太子少保即拜太保累歷州刺史

初母早終從母賢妃鞠之八年迎賢妃外邸事之甚謹其女弟淮陽涼國二公主亦早卒撫甥與已子均帝益愛之嘗被疾帝自祝禱既瘳幸其第置酒賦詩為初生歡帝嘗不豫業妃弟內直郎韋賓與殿中監皇甫恂妄言休咎事賓生死恂貶錦州刺史妃恐降服待罪業亦不敢入謁帝聞遽召之業伏殿下請罪帝趨就執其手曰吾所猜于兄弟者天地共咎之遂復燕歡仍諭妃復位俄進司徒二十二年業有疾帝憂之一昔容髮為變

及薨帝悲不能食冊書加贈及諡陪葬橋陵十一子

世系

表祇載
十人

其聞者瑗瑒瑁帝後追思業引見瑗等傷之乃

下詔共賜實封千戶瑗為樂安王瑒滎陽王宗正卿瑁
為嗣薛王歷鴻臚卿天寶中瑁舅韋堅為李林甫所搆
坐貶夷陵別駕徙置夜郎南浦及安祿山亂乃還京師
曾孫知柔嗣王再為宗正卿久之擢京兆尹始鄭白渠
梗壅民不得歲知柔調三輔治復舊道灌浸如約遂無
旱虞民詣闕請立石紀功知柔固讓得止累檢校司徒

同中書門下平章事又詔營緝太廟判度支充諸道鹽鐵轉運使昭宗出莎城獨知柔從乘輿器用庖頓皆主之大細畢給性儉約雖位通顯無居第未幾出拜清海軍節度使在鎮廉潔貢獻時入進檢校太傅兼侍中仕凡四紀常為宗室冠卒于鎮

隋王隆悌始封汝南王早薨睿宗追王贈荊州大都督爵不傳

欽定續通志卷一百八十四